

# BONERIANO

yu di mas chikitu  
ta mata mama...

EDITOR:  
Bonaire Communication Services N.V.

Djárason 16 Ougùstùs 2023 | Preis: \$1.25

## KOMPANIA LOKAL PERHUDIKÁ

Bunita gesto pa FuHiKuBo



Relashoná ku FuHiKuBo su 25 aniversario awe nos fundashon a risibí un dushi bolo di un di nos boluntarionan for di Hulanda. Masha masha danki na Roos Pourier i nos tambe ta yama bo danki pa bo tremendo aporte na nos

Ta evaluá  
impuesto di  
turista mi-  
nusiosamente  
PAG: 4

Prosedura pa  
nombramentu  
Gezaghebber  
nobo  
PAG: 5

xerox™

OBERSI  
ELECTRONICS  
BONAIRE



MANTENE BO  
VEHIKULO OF  
EKIPO DEN  
KONDISHON  
KU PIESANAN  
KUMPRA NA NAPA



CHANGAN AUTO



f /dabboussimotors

Merikanonan ta atvertí pa  
temporada di orkan riba  
normal

PAG4

*No a konstatá nada iregular*

## Nel Emerenciana bèk na trabou

**KRALENDIJK** – Nel Emerenciana ta bèk na trabou, esaki despues di a keda suspendé relashoná ku un investigashon riba integridat komo hefe di e seshon di realisashon.

Awe djárason 16 di ougùstùs Emerenciana mester mèldu na na e seshon di ICT pa tuma su deskripshon di trabou. No ta konosí sinembargo ku e ta keda den mesun funshon na Direktorado di R&O.

Dia 4 di novèmber 2022 a suspendé Emerenciana a base di artíkulo 43 i 84 di e desishon di posishon di derecho di ámtenarnan BES, un suspenshon komo medida di òrdu relashoná ku un investigashon pa su aktuashon komo hefe di e

seshon di realisashon.

Entre tantu a terminá e investigashon. Mirando ku no a konstatá ningun iregularidat, a kita e suspenshon. Pa medio di un karta di Kolegio Ehekutivo datá

14 di ougùstùs, ta informá Emerenciana pa akudí awe djárason 16 di ougùstùs pa mitar di ochi di mainta na e seshon di ITC, pa buska su deskripshon di trabou.



## Pronóstiko di tempu pa Boneiru

Djars 15 te Djárason 16 Ougùstùs 2023  
Okashonalmente nublá i algun áwaseru isolá

Ta okashonalmente nublá i de bes en kuando lo tin algun áwaseru isolá. E temperatura máksimo lo ta aproksimadamente 33°C, e temperatura mínimo mas o ménos 28°C. E bienu ost ta moderá te basta fuerte, forsa 4-5.

Altura di ola: aproksimadamente 1.5-2.0 m (5-7 pia)

\* Altura di ola válido pa laman grandi



Kuerpo Polisial Hulanda Karibense (KPCN) ta buska un:  
**KOLABORADÓ DI MANEHO PA HEFE DI KUERPO POLISIAL I HEFE DI OPERASHON POLISIAL**

Bo ta un kolega desisivo ku sensibilidat di maneho i organisashon? Bin traha pa nos!

Mas informashon?  
Bishitá [www.rijksdienstcn.com/vakatura](http://www.rijksdienstcn.com/vakatura)

Fecha di klousura: 30 di ougùstùs 2023

## Selebrashon Patrono San Bernardo

**KRALENDIJK** -- En konekshon ku e preparashon pa fiesta di Patrono San Bernardo, Parokia San Bernardo ta invitá tur parokiano, gruponan di orashon, religioso, bishitantenan i tur fiel di Boneiru en general, na misanan di e triduo ta 7'or di anochi

Djaweps 17 di ougùstùs no tin misa mainta, tampoko adorashon. Djabièrnè 18 di ougùstùs i djasabra 19 di ougùstùs ta dia di fiesta.

Djadumingu 20 di ougùstùs tin misa solèm ku entrada den proseshon pa 9'or di mainta i tambe misa anochi 7'or. Promé ku e misanan di triduo ta resa rosario mitar di shete di atardi.

Ta invitá tur parokia-

no, especialmente miembronan di gruponan di orashon, pa bin partisipá na rosario i Santa Eukaristia riba e tres dianan binidero.



## KURSO ELECTRO BASIKO, AMTS, BONAIRE - KRALENDIJK

### Prefasio

Bonaire ta desaroyando hopi lihé, tin hopi konstrukshon ta andando. Tur mester tin instalashon di koriente.

Instalashon di koriente di kas mester ta segun regla. Komo parti di Hulanda ta un regla tin, NEN 1010. NEN1010 ta na Hulandes. Hopi hende ku ta buska na pan di kada dia instalando kas no ta komprendé Hulandes bon. Nos kursonan ta na Papiamentu.

Pa un persona komprendé e prinsipio di un instalashon i espeshalmente e seguridat ku ta rekeri, e mester sa kiko ta koriente i e reglanan di instalashon.

### Meta di e kurso

Por lo general e meta di e kurso (Modül 01) ta: Pa na final e kandidato(a) ta kapas pa komprondé e funshonamentu básiko di elektrisidat i e tres sirkuitonan basiko. Di manera ku dor di usa hèrmènti i reglanan (NEN 1010) e kandidato(a) por diseñá i traha riba instalashonnan básiko di kas. Alabes e por midi i solushoná problemanan chikitu riba e sirkuitonan aki.

### Preparashon nesario

Alomenos nivel 1 òf mas, lesa i komprendé Papiamentu bon.

### Durashon i orario

Kurso teorétiko 40 ora di lès  
Práktika 30 ora di lès  
Orario tentativo: 19:00 pa 21:15; 2x pa siman

### Periodo

11 sèptèmber – 8 desèmber 2023

**25 ougustus 18:30 – 19:30 atardi di informashon na Kaya Tanki di Matrimonio 34.ACM NV, Bonaire CN**

**Mobile/W-app: + 599 796 4813**

**Email: [amtsktm30@hotmail.com](mailto:amtsktm30@hotmail.com)**

# KOMPANIA LOKAL PERHUDIKÁ

KRALENDIJK- Últimamente por nota un desaroyo bastante preokupante riba nos isla. Mas i mas kompania òf persona for di eksterior ta ofresé servisio òf produkto riba medio sosial. Básikamente e kompania òf persona ku no ta inskribí òf registrá na Boneiru ta hasi negoshi aki sin niun klase di restriksion. No

solamente ta krea un situashon den kual ta perhudiká kompanianan lokal pero tambe nan no ta paga impuesto, pues ABB.

Entidat Públiko Boneiru (EPB) no por hasi masha kontra di e fenómeno aki. “E fenómeno aki tin mi atenshon pero no ta algu ku EPB por atendé. Ta Reino mester atendé esaki mirando ku

ta nan ta kobra impuesto”, diputado di Finansa Jolinda Craane a splika.

BONERIANO a tuma kontakto ku nos Servisio di Impuesto (Belastingdienst) i nos ta wardando riba nan reaksion.

E situashon aki a kuminsá na momentu ku vários empresa i persona for di Hulanda a ofresé nan servisio i produkto.

Nan ta hasi uso di página di Facebook manera ‘Durf te vragen’ i ‘Bonaire4Sale’, ku un base di dato enorme. Esaki ta hasi posibel ku kantidat grandi di habitante di Boneiru ta risibí e oferta di e kompanianan aki.

Awor por nota ku vários kompania i persona for di Kòrsou tambe ta sigui e fenómeno aki. Tur siman por nota por lo ménos 3 promoshon ofresiendo vários servisio. Tin persona ta ofresé pa midi kortina i manda nan, otronan ta buska guia ku konosementu di nos kueba, pa hasi un pelíkula pa un proyekto pa mucha na Hulanda. Por nota basta promoshon pa personanan ku ta bin i organisá tayer pa hasi uña, hasi kabeyi i asina tin hopi ehèmpel mas.

“Mi ta mira regularmente kon empresanan for di eksterior ta trata na hasi negoshi aki. Tin temporada ku esaki ta intensivá. Den temporada di fakansi bo tin mira mas promoshon, e tendensia di bin gana algu di sèn durante fakansi”, polítiko Gianni van der Heuvel-Guerrero a splika. Na vários okashon el a advertí tokante e desaroyo preokupante aki. Miéntras tantu por nota ku e situashon a bira pió.

Riba medio sosial e diskushon tokante e topiko aki ta intenso i spesialmente empresa chikí na Boneiru ta sinti e efekto di e fenómeno aki.

“Bo sa kon difísil ta pa krea un base di kliente fiho? Awor tur hende ke bin traha sèn na Boneiru stroba nos merkado”, un empresario chikí ta bisa.

Segun van der Heuvel-Geurrero den nos leinan tin básikamente un buraku. “E parti di ‘gastarbeider’ a keda habrí. Esaki ta enserá ku no por pone restriksion sin mas.” E ta haña ku Belastingdienst por ta mas pro aktivo pa detektá e kompanianan/personanan aki. “Den pasado nan tabata buska drechi di kiko i kon. Tabatin un dosié spesial di e tipo di situashon asin’aki. Aunke awor mi ta nota ku hopi hende òf kompania no ta pone adrès mas. Bo mester registrá pa nan manda bo un meil.”

Diputado Jolinda Craane ta enfatisá su atenshon pa ku e situashon. “Lo mi trese esaki pa Belastingdienst i tur esnan konserní.”

Gianni van der Heuvel-Geurrero ta haña ku no opstante algu ta pará den lei òf nò, semper gobièrnu por atendé ku situashonnan preokupante den un komunidad. “Mester protehá nos merkado. Gobièrnu por kuminsá ku un kampaña pa konsientisá nos mes hendenan di e konsekuensia. Kisas bo ta paga algun sèn mas tiki serka e kompania di eksterior pero e ta perhudiká bo merkado ekonómiko.” Tambe e ta haña ku Kámara di Komersio komo representante di empresanan mester aportá na e kampaña di konsientisashon. “Mester hasi nos hendenan konsiente di e importansia di kumpra serka lokal. I wak kada situashon kritiko.”

E foto ta ilustrá un tipo di promoshon for di Kòrsou pa duna konteksto na e artíkulo.

**FICUS ESTEHTIC & CHIC LASH ARE COMING TO BONAIRE**

✈️ 23nd Till 27th of AUGUST

🇵🇸 YES!!! The sugarwaxing master & the lash master are coming to Bonaire 🇵🇸

**Package :**

**Hollywood + Armpit + Russian fullset : 100\$**



Hollywood+armpit  
60\$



Russian Fullset  
60\$

**BOOK NOW LIMITED SPOTS AVAILABLE**

 CHIC.LASHLOUNGE  
 FICUS.ESTHETIC  +59996734262

## Ki dia ta tuma medida kontra bròmer?

KRALENDIJK – “Ki dia ta tuma medida kontra e koredónan di bròmer irresponsabel i ku ta krea un molester den komunidad. Hasiendo bochincha ku nan rankada den kaya i anochi strobando hende di drumi i otronan ku ta kome den restorant i na e beibinan ku ta den wig.

Ta kousa spantu i por hasi daño na nan oido.” Esaki siudadano Robby Domacassé ta trese dilanti.

E ta splika ku e no tin problema ku koredó di bròmer i tin hopi admirashon pa tur e koredónan ku nan abilidad di kore i hasi nan kenshinan, pero no kitando hende su trankilidad

pa bo diberti.

Domacassé: “E peliger ku ta kousa ku hende tin ku kita for di den kaminda pa bo hasi bo ko’. A yega tempu pa pone un paro na e abusunan aki. Outoridat mester tuma medida mas pronto posibel kontra e bagamunderia aki.”

# Ta evaluá impuesto di turista minusiosamente


**KRALENDIJK** -- Entidat Públiko Boneiru, huntu ku partnernan manera TCB, BONHATA i IND, ta bai wak kiko ta bai bon aktualmente i kiko por bai mas mihó ku kobransa di impuesto di turista.

Ta bai analisá minusiosamente tur keho, opheshon i remarke ku a risibí durante e aña tras di lomba. Ta wak e ordenansa mes tambe, manera e tarifa di impuesto, e tempu ku e ta vigente i e kategorianan ku ta bini na remarke pa eksepsion di tarifa.

Diputado Jolinda Craane, kende ta responsabel pa turismo, ta pone én-

fasis riba importansia di un sistema di impuesto hustu i bon pensá: “E aña akí nos ta bolbe hasi uso di e puntonan di evaluashon di aña pasá. Ehekutabilidad efisiente ta un kriterio importante pa nos. Un ordenansa di impuesto mester ta ekilibrá i ehekutabel den práktika.”

Seguidamente ta proponé e rekomendashonnan di e komishon di evaluashon na Konseho Insular. Na luna di desèmber aña pasá Konseho Insular a desaprobá e kambionan anteriormente proponé na fin di aña 2022 komo insufisiente.



*Debí na subida temperatura di laman*

## Merikanonan ta atvertí pa temporada di orkan fuerte

**KRALENDIJK** – E temporada di orkan di 2023 a base di pronóstiko, lo ta mas fuerte ku normal, asina Climate Prediction Center di National Oceanic and Atmospheric Administration, NOAA, ta atvertí. Esaki ta bini dor di temperaturanan di laman haltu eksepsional den Oséano Atlántiko.

Sientífikonan di NOAA a adaptá nan pronóstiko anterior di aktividatnan kasi normal na riba normal pa e temporada di orkan aktual. E temperatura kayente den Oséano Atlántiko na kalkulashon, ta kompensá e sirkunstansianan atmosférico ku ta bai huntu ku un sosesidu persistente di El Niño.

El Niño ta un fenómeno klimatológiko ku ta keda karakterisá dor di superfisianan di laman kayente apnormal den e oséano pasífiko trópiko. E fenómeno akí mundialmente tin efekto riba e patronchi di wer i por ta tambe di influensia riba e desaroyo di siklonnan tropikal, bou di kua orkan.

Ounke ku hopi biá El Niño tin e noshon pa stroba desaroyo di orkan, tabatin kasonan den kua E Niño no tabatin efekto signifikante riba e temporada di orkan.

Segun Matthew Rosenkrans, e pronostikadó en hefe di NOAA, e faktornan di klima importante pa e temporada akí ta e El

Niño persistente i e fase kayente di Atlantische Multi-Decadal Oscillation, meskos tambe e rekòrt di kayente di e temperaturanan di laman di Oséano Atlántiko.

Ounke ku El Niño hopi biá ta limitá e aktividatnan di siklonnan trópiko, e sirkunstansianan limitá e temporada akí ta desaroyá lento i posibel falta durante di un parti grandi di e restu di e temporada di orkan.


E chèns riba un tempo-

rada di orkan riba normal, a oumentá ku 60 porshento, en bista di e pronóstikonan anterior di 30 porshento na mei. E chèns riba aktividatnan kasi normal a baha na 25 porshento, miéntras e chèns riba un temporada bou di normal, a keda kalkulá riba 50 porshento.

E aktualisashon akí ta pronostiká 14-21 tormento mensioná, di kua 6-11 orkan por bira orkan i 2-5 di nan por bira orkan pisá. E pronóstiko akí tin un kon-

fiabilidad di 70 porshento i ta kontené e tormentanan ku te na e momentu akí a originá.

E aña akí e temporada di orkan a kuminsá tempran ku sinku tormenta ku kasamente a alkansá e forza di tormenta trópiko, di kua unu ya ku a bira orkan. Un temporada di orkan promedio ta produsí 40 tormenta, di kua shete orkan, inkluso tres orkan pisá.



**Seres construction B.V**

ta buska

**-Carpintero**

Mas info yama na telefon

**701-8320**

## Moveshonnan interesante den Playa

*E dianan aki reporteronan di BONERIANO a topa ku moveshon di algun persona 'uniformá' den Playa. Nos fotógrafo a saka foto, pero no por a haña mas informashon. Bon pa esnan responsabel pa e moveshonnan aki tuma kontakto ku redakshon di BONERIANO pa mas informashon.*



# Prosedura pa nombramentu Gezaghebber nobo

**KRALENDIJK** – Ta importante pa sa kiko ta e prosedura pa nombra un Gezaghebber nobo pa Boneiru. Den sekshon IV, artíkulonnan 73 – 87, di e Lei Entidatnan Publiko Boneiru, Sint Eustatius i Saba, e lei konosí mihó bou di su abreviashon WolBES, ta stipulá e prosedura pa yega na nombramentu di un Gezaghebber. Tur otro legislashon mensioná tin su base legal den WolBES.

Un stipulashon klave ta, ku ta nombra un Gezaghebber pa Dekreto di Korona, huntu ku Konseho di Minister ta tuma e último desishon. Gezaghebber ta un funshonario di Gobièrnu Nashonal. Representante di Reino tin un papel sentral den henter e proseso.

## Diseño di profil

Despues ku vakatura a habri i a publiká esaki, kandidatonan ta manda nan karta di motivashon i nan resúmen profeshonal pa Su Mahestat Rei. Konseho Insular por disidí di forma un asina yamá Komishon di Konfiansa, ku ta entrevistá

e kandidatonan ku Representante di Reino a selektá. Entrevistanan ta tuma lugá basá riba e asina yamá Diseño di profil

pa un futuro Gezaghebber ku Konseho Insular por stipulá. Konseho Insular di Boneiru en bèrdat a forma un Komishon di Konfiansa, konsistiendo di e lidernan di frakshon i a formulá un Diseño di profil.

Di tur solisitut ku a drenta, Representante di Reino ta hasi un selekshon basá riba vários kriterio mensioná den legislashon. En breve, Representante di Reino ta disidí kua kandidatonan por nombra en prinsipio.

Kada miembro, Griffier i konsehero di Komishon di Konfiansa, un diputado, ta risibí e kartera ku ta kontené solamente e pakete di dokumentonan tokante e kandidatonan selektá. Komishon di Konfiansa no ta na altura di esnan ku sí a solisitá, pero ku no a pasa e proseso di selekshon di Representante di Reino.

## Konfidensialidat apsoluto

Durante henter e proseso, miembronan di Komishon di Konfiansa i konseheronan, ta prohibí di diskuti òf buska informashon adishonal den kualkier forma tokante e kandidatonan selektá serka personanan òf instansianan tersero. Nan por deliberá solamente huntu ku otro, den seno di Komishon i basá riba e dokumentonan risibí. Ningun kontakto ku kandidatonan, selektá òf no selektá, tokante contenido di e proseso di solisitut, por tuma lugá. No ta permití dunamentu na personanan tersero, òf petishon di informashon na personanan òf instansianan tersero.

E entrevistanan ku Komishon di Konfiansa ta hiba ku e kandidatonan selektá, ta organisá den tal forma ku riesgonan pa privasidat di kandidatonan òf pa e responsabilidatnan di Komishon di Konfiansa ta seriamente limitá. Koutela ta para sentral.

## Metodologia uniforme

Ku e diseño di perfil komo punto di salida, Kom-

ishon di Konfiansa ta hiba e entrevistanan basá riba un metodologia uniforme, pa asina Komishon por evaluá tur kandidato riba mesun kriterio i prioridatnan spesífiko. Komishon ta entrevista tur kandidato selektá i despues di esaki ta traha un relato final den kua Komishon ta motivá su preferensianan pa poko kandidato spesífiko, atrobe basá riba un metodologia uniforme di evaluashon.

Representante di Reino ta risibí e relato di tur entrevista, inkluso e rekomendashonnan di Komishon di Konfiansa i Representante di Reino huntu ku Komishon ta deliberá tokante di e relato. Representante di Reino por disidí di sea

sigui, òf desvia di e rekomendashon di Komishon di Konfiansa.

Representante di Reino ta manda tur dokumento relashoná ku e proseso aki pa Minister i ta rekomendá dos nòmber di persona pa nombramentu. Minister ta nombra e gezaghebber nobo. Ora Minister su nombramentu ta desvia di e rekomendashonnan di Komishon di Konfiansa, Minister ta motivá su desishon.

Tur informashon, dokumento, relato, korespondensia i deliberashon tokante e kandidatonan ta keda sekreto tantu durante, komo despues di finalisashon di proseso.

*No a konta dos sitio importante den Slagbaai*

## Ménos lora kontá

**KRALENDIJK** – Djasabra 29 di yüli Fundashon Echo a tene su konteo di lora pa hasi un kalkulashon di e populashon mínimo di lora na Boneiru. Un total di 49 boluntario entusiasma a lana tempran pa yuda akumulá e informashonnan sientífiko akí.

Na tur a kontá 498 lora na 19 sitio di drumi. E sitionan di drumi di lora pa un gran parti na den rònt di Rincon i den Parke Nashonal Washington-Slagbaai.

Pero tambe boluntarionan a kontá lora otro kaminda riba e isla na e sitionan konosí kaminda lora ta drumi. E konteo a tuma lugá simultáneamente, esaki ke men ku

na mes momentu e kontá na diferente sitio.

E aña akí a kontá ménos lora ku añanan anterior. Esaki ta debí ku no a kontá dos sitio importante den Slagbaai. Semper e resultado di e konteo ta un kalkulashon di e kandidat mínimo di lora riba e isla.

Durante e konteo, boluntarionan tabata testigu di momentu ku e loranan ta lanta. Esaki ta bai ku hopi zonido. Despues e loranan ta bula bai en buska di kuminda, un eksperensia úniko.

Esnan ku ke eksperensia e eksperensia úniko akí, por yuda Echo na e siguiente konteo ku ta tuma lugá djasabra 27 di yanüari 2024.

## Representante nobo di patrosinadó Prensès Beatrix

**KRALENDIJK** -- For di luna di yüni 2023 Arno Willems ta e representante Real di patrosinadó Su Altesa Real Prensès Beatrix, pa Dutch Caribbean Nature Alliance (DCNA). Ku esaki el a bira sucesor di Jaap van Leeuwenburg, kende a ehersé e funshon akí for di aña 2009 te aña 2023 i resientemente a baha ku penshun.

DCNA ta un organisashon ‘non profit’ ku a lanta pa protehá naturalesa i promové maneho sostenibel di rekursonan natural na e seis islanan Karibe Hulandes.

Arno Willems nasé na 1959, a studia selvikultura na e Skol Superior di Agrikultura na Wageningen. El a traha entre otro na e mesun skol superior akí, na Staatsbosbeheer, na Ministerio

di Agrikultura, Naturalesa i Kalidat di Kuminda i na Mali pa e fundashon di boluntario Hulandes. El a realisá konsultashon tambe den Balkan, den Kaukasus i den diferente pais afrikano. Su tereno di trabou ta enserá selvikultura, maneho di naturalesa i agrikultura.

For di aña 2013 Willems ta ‘Rentmeester’, manehadó di propiedatnan inmóvil, di Kroondomein Het Loo, un finka real di mas ku 10 mil hèktar.

Segun Willems, maneho di naturalesa ta prinsipalmente trabou di man di hende i bai pokopoko ku naturalesa ta algu sumamente sabí, ta un naturalesa so nos tin.

“Nos ta demasiado orguyoso di DCNA su patrosinadó Su Altesa Real Prensès Beatrix. Su Altesa Real

Beatrix tin un laso spesial ku Karibe Hulandes i semper el a sostené nos trabou di protekshon di e bunita naturalesa tropikal. Nos ta hopi agradesido tambe pa su sosten i e plasentero kolaborashon ku su anterior representante Jaap van Leeuwenburg. Nos ta anhelá pa kontinuá e trabounan ku Arno Willems,” segun Hellen van der Wal, presidente di DCNA.



# Aktualisashon Mateo i Gabriela

KRALENDIJK – Pa a pensa ku Mateo tambe a un momentu durante bandoná Boneiru i tabata wikènt, Sea Turtle Conservation Bonaire, STCB, na kaminda pa su área di kome.

Apesar di esei, djaluna mainta el a bolbe chèk i a hañ'é bèk na Boneiru. Parse ku el a bai pa un landá chikitu nort di Boneiru. Esaki ke men ku pone mas webu.

Gabriela a bin ta dediká su tempu banda di kosta di Colombia i ta keda den mesun área. Ta interesante pa sa ki dia e ta bandoná Colombia pa su área di kuminda.

Pa STCB ta intere-

sante pa tende kiko hende ta pensa di e moveshon di e dos turtuganan akí. Pa sa mas di nan ruta, chèk e web-site:

<https://www.bonaire-turtles.org/.../08/03/mateoandgabriela/>

## AANKONDIGING

Bij exploiten van veertiende (14de) augustus 2023, waarvan afschriften is achtergelaten aan de E.A. Heer Officier van Justitie bij het Gerecht in Eerste Aanleg op Bonaire, heb ik, **MARISOL A.A. MANUEL-BERNABELA**, deurwaarder bij het Gerecht in Eerste Aanleg op Bonaire, gevolggevende aan de beschikking van de E.A. Heer rechter in het Gerecht in Eerste Aanleg, zittingsplaats Bonaire, ten verzoeken van Naamloze Vennootschap UNISENSE INTERNATIONAL HOLDING N.V., gevestigd op Bonaire, ten deze zake domicilie kiezende op Bonaire, ten kantore van de deurwaarder, aan De Naamloze Vennootschap **VILLAS DEL MAR N.V.**, gevestigd te Bonaire, zonder bekende adres op Bonaire of daarbuiten, BETEKEND, de grosse van een vonnis dd 26 juli 2023, door de E.A. Heer Rechter in het Gerecht in Eerste Aanleg van Bonaire, Sint Eustatius en Saba;

De deurwaarder voornoemd,  
**MARISOL A.A. MANUEL-BERNABELA**

## BECS

ta buska

-persona pa limpiesa

-persona pa manteshon general

Mas info yama na telefon

**717-2197**

## DUNA FRUTA

"Keda den Mi, i Ami den boso. Meskos ku e rama no por karga fruta di su mes, si e no keda den e mata di wendruif, asina boso tampoko, si boso no keda den Mi. Ami ta e mata di wendruif, boso ta e ramanan; esun ku keda den Mi, i Ami den djé, esei ta duna hopi fruta, pasobra separá di Mi boso no por hasi nada." Juan 15:4,5(BS)

E mucha akí si ta traha. E ta stroba e otronan. Esaki tabata mi pensamentu tokante un mucha hòmber durante plan di vakashon di Beibel na Jarabacoa. No a dura muchu ku deboshon pa e lidernan a bin na mente; Keda den Kristu, stima meskos ku Dios ta stima bo!

Tabata e momento perfekto pa pone e versikulo di awe na práktika. "Keda den Mi, i Ami den boso." Si di bèrdat mi tin un relashon íntimo ku Dios, mi mester mustra fruta di esaki. Dios a duna forsa i sabiduria pa atendé ku e yu akí i riba tur kos, ku amor! A resultá ku loke mi a siña di dje tabata un bendishon pa mi bida.

Tres karakterístika di fruta:


1. E ta reflehá karakter di su palu – Mi mester reflehá karakter di Hesus
2. E ta visibel – Otronan mester mira Hesus den mi
3. E ta benefisiá un otro – Mi mester ta sirbiendo otro

Komo yunan di Dios nos mester keda den e mata di wendruif, Hesus. E rama, nos, mester ta pegá na e mata kontinuamente pa por duna fruta. E karakterístikanan ariba mester ta presente den nos bida diariamente. No por ta asina ku henter siman nos ta leu di e mata i djadumingu nos ta busk'É. "Si un hende no keda den Mi, e ta wòrdu tirá afó manera un rama i ta seka; i hende ta rekohé nan i ta tira nan den kandela, i nan ta wòrdu kimá." Juan 15:6.

Bo ke ta un rama ku E ta tira afó den kandela òf un ku ta duna fruta?

Gilda Beukenboom-Sintjago

Produksion PGM



## Programanan di Bonaire.tv

TELBO kanal 70

Flamingo TV kanal 23

### Djárason 16 Ougùstùs 2023

12.00 Herensia:	Maria i Paul Maduro
13.00 Aki Boneiru:	Kas Flamboyan
14.00 Herensia:	Brigita Ilaria (Brida) Manuel-Martis
15.00 BAPA:	Melvin Meyers
16.00 Herensia:	Anton Burleson
17.00 Aki Boneiru:	FMK i Tutti Frutti 2019
18.00 Herensia:	Fransisco Romauldo Gomez (Shon-Ma)
19.00 BAPA:	Marlon Bermudez
20.00 Aktualidat:	Tico Janga
21.00 Aki Boneiru:	Cees Luckhardt charla
22.00 Herensia:	Ange Marie Jessurun
23.00 BAPA:	Lucerio Winklaar

Tur mèrdia 12'or ta kuminsá un programashon nobo di 4 ora.

E programashon aki ta ripití pa 24:00.

**Bonaire.tv**  
Historia | Kultura | Naturalesa

# Promé Torneo di Peska

**KRALENDIJK** -- Pa promé biaha PiskaBon ta bai organisá un torneo di piskamentu. Esaki ta solamente pa piskadó lokal. Miembronan di direktiva di

PiskaBon a papia ku prensa i a duna algun informashon tokante e kompetensia di piskamentu.

Ernst Delanoy, presidente di PiskaBon, a bisa:

“Boneiru ta konosí pa kompetensia di piskamentu. No solamente e hende por biba di dje, pero tambe e ta un parti deportivo. Nos mester balorá i ta orguyoso di

loke nos ta bon den dje. Tur aña ta bai sigui organisá e aktividat. Ta promé biaha ku Piskabon ta organisá e kompetensia i tin plan grandi pa futuro. Nos ta hasiendo hopi pa e piskadó boneriano. PiskaBon ta para pa kalidat. E ta importante pa e hende haña bon piska kumpra. PiskaBon ta traha habrí pa komunidad, spesialmente e piskadó.”

Despues a splika e reglanan. Djabièrnè prome di septèmber, kapitannan por pasa pa un enkuentro, na

Parke Tului. Tur hende ta pasa pa registrá.

Dia 2 di septèmber ta e fecha di kompetensia pa piskamentu mainta te 4or di atardi. Despues di 4or di atardi no ta pisa piska mas. For di 10 di mainta ta kuminsá ku pisamentu. E piska ku nan piska ta pa nan mes. Ta bon pa kompetí ku solamente piská ku a piska riba e dia. No mester paga pa inskribí. Ta bai tin kategoria di boto grandi i boto chikitu.



## No tin skarsedat mas di webu

**KRALENDIJK** -- Definitivamente no tin skarsedat mas di webu di galiña na Boneiru. Esaki ta notabel den supermerkadonan lokal, na unda por haña awor un surtido ámplio di webu tantu lokal komo importá.

Aña pasá a surgi un skarsedat serio di webu, loke a pone ku supermerkadonan lokal a tuma medida pa evitá ku klientenan ta bai ku kantidat grandi di kaha di webu. Na sierto supermerkadonan asta no tabata pèmití pa klientenan bai ku mas ku un kaha di webu.

E skarsedat tabata debí ku produkshon di webu na Punta Blanku Chicken, pa vários motibu, a kai den forma drástiko. Esaki a pone ku supermerkadonan lokal a kuminsá ta importá webu for di Merka i Colombia.

Por komprondé ku Punta Blanku Chicken-farm awor ta na un nivel di produkshon di webu hopi bon atrobe, esta di masoménos 12.000 webu pa dia, ku perspektiva di

sigui subi. Banda di Punta Blanku, ku tin e krio di galiña mas grandi na Boneiru, na

Tanki Bentura, pa nort di Rincon, tambe tin un empresa ku produkshon di webu di galiña.



Webu importá den dos kaha na un supermerkadu.

## Despues di desishon di Korte Diputado Craane ke dialogá ku sektor di hotèl i restorant

**KRALENDIJK** -- Wes a disidí ku e ordenansa pa impuesto di awa di kloaka, manera Konseho Insular a aprobá esaki, no ta bálido. Kolegio Ehekutivo a risibí informashon ku wes a risibí informashon ku wes a duna e veredikto aki den e kaso ku Bonhata e entamá tokante e ordenansa di impuesto di awa di kloaka.

‘Entidat Públiko Boneiru tin e posibilidat pa bai den apelashon, pero mi ta preferá un kòmbersashon. Ta mi promé eskoho pa bai den konsulta ku e interesadonan i haña un areglo

nobo ku por presentá na Konseho Insular. Dentro di poko e interesadonan lo risibí un invitashon pa esaki’, segun diputado Jolinda Craane.

Bonhata no tabata di akuerdo ku prinsipalmente hotèl i restorant mester a paga hopi mas tantu, kompará ku kas di famia i ofisina. Wes a duna nan rason. Segun wes e ordenansa ku Konseho Insular aprobá ta enpugná ku e prinsipio di igualdat i proporsjonalidat.



# Aksidente di tráfiko den Antriol Pabou

**KRALENDIJK** – Djaluna atardi tabatin un aksidente di tráfiko na salida di Kaya Gramèl den Antriol Pabou. Ta e kaya ku ta konekta riba Kaya Korona, suít di e edifisio di Toezicht & Handhaving (T&H). Dos

outo tabata embolbí den e aksidente aki. Resultado di e choke aki tabata hopi daño material na ámbos vehíkulo embolbí. No tabatin herido afortunadamente.

Reporteronan boneriano por komprondé ku tabatin

último dlanan mas aksidente na e mesun krusada aki, loke tin di aber ku e echo ku debí na drechamentu di Kaya Korona tráfiko di outo a bira hopi den e área aki. Pues ta importante pa kore ku koutela.



A bira tempu pa sindikalismo di Boneiru atraves di un kongreso òf seminario laboral bini huntu den un dia di estudio pa atendé ku rekomendashonnan balioso ku den práktika di sindikalismo ta respondé mihó na e eksigensianan di tempu aki na Boneiru. Awe den e kolumna sindikal, mi kier a trese algun di e rekomendashonnan básiko aki. Mi ta spera ku sindikalismo ta kue e rekomendashonnan aki na serio pa yuda fortifiká funshonamentu di sindikalismo na Boneiru.

E promé rekomendashon ta pa stipulá un modelo fiho pa un kontrato kolektivo den kua ta pone e areglonan minimo, manera lei ta preskribí. Esaki ta pa evitá ku ta traha pal-

*Nòchi Willem, konsehero di Union Sindikal Boneriano, USIBO*

## Sindikalismo na Boneiru(31)



abrashonnan ku ta bai kontra di lei.

E di dos rekomendashon ta pa laga hasi un investigashon pa wak e posibilidat pa bin ku ku kontratonan kolektivo ku ta aplikabel pa diferente kompanianan. Den esaki lo por usa e kompanianan den kua gobiernu ta e akshonista mayó. Den esaki por pensa riba Selibon, Telbo, WEB, BIA, TCB, BONLAB ets.

E di tres rekomendashon mester enfoká riba e obligashon pa manda e kontratonan kolektivo na e ministerio di asuntunan Sosial i di Labor.

E di kwater rekomendashon ta pa rekonsid-

erá e posibilidat aktual di e stipulashonnan den lei, ku ta brinda espasio pa desviá pa ménos kondishonnan den cao. Ku otro palabra e posibilidat pa via cao yega na kondishonnan ku ta ménos ku lei ta preskribí.

E di sinku rekomendashon ta dirigí riba tantu sindikatonan komo dunadónan di trabou organisá den Diálogo Sentral pa kompará e kontratonan kolektivo den sektor privá ku esnan di empleadonan públiko pa asina por sinkronisá e asina yamá "best practices" den e CAO-nan.

E di seis rekomendashon ta pa amplia e kódigo

sivil Bes ku stipulashonnan ku ta ko-insidí ku e artikulo 668a i 657 di e buki 7 di e Kódigo Sivil Oropeo. Aki por atendé e asuntu di kontratonan kòrtiku ku ta promové insegiridat laboral.

E siguiente rekomendashon ta pa pone den lei ku "vakantietoelage" ta obligatorio komo un parti di e salario, ekspresá den porsentahe. Na Ulanda esaki ta kaba legalmente obligatorio.

Interesante ta tambe pa bin ku un análisis pa loke ta orario di trabou, kaminda pa sierto ofishinan por konsiderá trahamentu den dos plug teniendo

kuenta ku nos klima i kaminda e orario di trabou ta krea mas produktivitat, pero alabes ta duna e trahadó mas espasio pa atendé su asuntunan personal sin tin mester di interumpí trabou.

Finalmente ta rekomendabel pa rekonsiderá e lei di referèndum, kual últimamente a trese asina tantu diskushon i ku segun mi opinion no ta kuadra ku e espíritu di e tempu aki i ku no ta duna honor i respèt na un derecho demokrátiko di e trahadó.

Banda di e rekomendashonnan konkreto aki, lo ta bon tambe pa bin ku un análisis i komparashon profundo entre e leinan laboral den Reino pa yega na un sinkronisashon i harmonisashon total di leinan laboral.



# SUBWAY tin motibu di eksistensia

**KRALENDIJK** -- Gerente di Subway a papia ku BONERIANO i duna un bista, kontu di e negoshi. Un kompania lokal 11 aña manhá pa hende lokal. Ta trata di Sapphira Coffie i Sherwin Pourier.

“Ta bai bon, apesar di hopi trabou, un reto amplio pa atendé kuné, pa por mantené eksistensia di Subway na Boneiru. Hopi kos ta pasa tras di kortina, promé ku e produkto final na e kliente. Subway na Boneiru, meskos ta e kaso na Kòrsou i Aruba, tur ta bou di e área di Karibe. Tur produkto ta bini for di Merka. E proseso ta stabil, pero ta sosodé sierto momentu un korementu formal pa por mantené e servisio stabil, loke ta un eksigensia ku kontrol di e kadena di Subway.”

Ta sosodé ku produkto no ta yega na e momentu korekto i esei no ta nos falta, sino falta di otronan. Tin momentu ku bo no tin sierto kos pa ofresé e klien-



te i nan por pensa ta nos no ta hasi e trabou pa e parti di mangasina i esei ta e konsekuensia. Ta nèt kontrali, nos parti ta na òrdu, pero di otro banda ta sosodé ku tin produkto ku no ta yega Boneiru na tempu. No ta kos ku ta pasa regularmente, pero mester ta atento pa momentu e presentá, atendé kuné, e doñonan a bisa.

E doñonan a sigui bisa, kisas un kliente por pensa i bisa dikun no ta buska produkto otro kaminda, esei

no por. E liña di Subway ta hopi fuerte den esei ku mester mantené solamente nan produkto. Otro kos, e produkto di Subway ta mará na fecha, pues no por buska kantidat grandi, sino mester tin bon bista kuantu mester pa por usa nèt e temporada promé ku bolbe hasi pedido na Merka. Mester ta ku wowo hopi skèrpi pa atendé ku fecha di vensementu. Nan ta kontrolá, pues no por tuma riesgo i desvia, pero ta un momentu pa otro un persona ta presentá pa wak sí bèrdat ta kumpli ku e regla di e liña di Subway.

Asina e ta funshoná ku tur e lugánan ku ta di Subway. Berdura ta un di e produktonan ku nos ta kumpra na Boneiru, pero nos tin palabrashon ku algun kompania i solamente ku nan, nos tin ku atendé, e doñonan a konta.

E doñonan a sigui bisa: “Nos trahadónan ta hasi esfuerso pa un bon produkto servisio riba merkado. Sigur nos ta kontentu ku e tim, nan ta traha den bon harmonia ku otro i na gerente. Nos ta nan doño di trabou, sinembargo nos ta hasi huntu ku nan e tareanan nesario na e lugá. Labamentu di glas, limpia mesa i stul, laba loke ku mester laba den kushina i e parti di prepará pan. Djis algun di e tareanan ku ta rekerí pa e Subway ta funshoná stabil.”

“Mi ta deseá pa kompartí òf duna un mensahe pa otro negoshinan, tur negoshi tin nan manera di komuniká i

ta importante pa buska informashon, kon hasi bo negoshi bon. Buska serka esnan ku tin eksperensia i no kere abo sa tur kos. Komo gerensia, bo tin responsabilidadat ku trahadó i pueblo,” un di a doñonan ta konsehá.

Subway tin plan pa durante 2024 hasi un remodelashon na e edifisio, esta kambia òf pone un kara nobo. Awor un bes no tin plan pa ekspanshon òf un mas Subway na Boneiru. Miéntras tempu ta pasa, tur e desaroyonan riba e isla, sigur por yega asina leu, ku ta krea espasio pa mas ku un tienda di Subway na

Boneiru. Esei ta loke gerente a splika tokante Subway. Nan ta yama danki na e pueblo di Boneiru, masha dushi hende i ku pasenshi pa kome algu saludabel.

Bèrdat manera nan a mensioná, pasenshi pa algu saludabel. Nan produkto ta saludabel. Berdura fresku semper ta duna mihó benefisio na e kurpa, ku e berdura kushiná. Generalmente hopi hende tin poko difikultat pa kome berdura, Subway su estilo, ta hasi posibel tòg, atraves di sousnan ku nan tin, pa kome diferente berdura sin ku ta sinti nan smak.



**Direktor di Credits Bonaire, Milagro Blanken, nèt a kaba risibí su baki ku kantidat di pan, loke Subway ta ofresé.**

**Payroll Pro**  
HRM  
www.payrollprohrm.com

The most complete payroll and HR software in the Caribbean!

Download the mobile app!  
Available on Google Play and the App Store

Ku e termino ‘boss’ ta bin di e hulandes bas

BO TABATA SA?

*Yuana ta alimento salú òf nò*

## Video via whatsapp ta kousa konsternashon

**KRALENDIJK** – Un video ku ta bayendo rònt via whatsapp e dianan tokante komementu di karni di yuana a kousa basta konsternashon. Segun e persona ku ta papia na spañó den e video aki, konsumo di karni di yuana tin su riesgonan, pasobra e ta hasi daño na hormonanan di hende hòmer, poniendo ku nan por bira homoseksual.

E hòmer ku ta papia den e video ta sita un informe ku aparentemente lo a sali den e revista ‘Ciencia y Desarrollo’. E informe di e publikashon aki lo ta basá riba estudionan ku a tuma lugá na entre otro na Mexico.

Segun e video, karni di yuana na promé bista ta parse saludabel, ku ingredientenan manera fòsfòr, kalsio i magnesio, pero e ta kontené tambe un mikro-parásito ku ta afektá e hormonanan maskulino, ku komo konsekuensia ku e hòmer por bira homoseksual.

Interesante ta ku den e kultura antiano, Boneiru inkluso, ta atribuí karni di yuana di tin ingredientenan pa hisa potensia seksual, popularmente bisá kos pa lanta brek, serka hende hòmer.

Di akuerdo ku contenido di e video, na Mexico ya kaba a konstatá basta kaso

di hòmernan ku ta kome hopi yuana ku a haña tendensianan komoseksual, kous’ pa e mikro-parásito menshoná.

**BONERIANO** a eksplorá Internèt pa haña mas informashon, pero no tin masha publikashon ku ta referí na e parti dañino aki di karni di yuana, loke ta pone bo pensa ku ta trata aki di notisia falsu (fake-news).

Un informe na spañó ta bisa: “Al comer la carne de iguana nuestro cuerpo recibe mucha fuente económica de proteínas. De acuerdo a la Universidad de Florida no hay ningún tipo de problema saludable con su consumo. Esta carne contiene un número mayor de proteína y menos grasa que el pollo. La Universidad San Carlos de Guatemala comparó el valor nutricio-

nal de diversas carnes, encontrando que 100 gramos de pollo tienen 18.6 gramos de proteínas y 15.1 gramos de grasa, mientras que 100 gramos de iguana tienen 24.4 gramos de proteínas y solo 0.9 gramos de grasa. Se ha demostrado con estudios que la carne de iguana aporta más minerales como calcio, magnesio, fósforo, hierro y zinc que la carne de pollo y vacuno.”



Den e programa di Bonaire Friends

# Tourism Corporation Bonaire ta rekonosé personanan ekstraordinario rekonosé

**KRALENDIJK** - Tourism Corporation Bonaire ta sumamente orguyoso di por honra personanan eksepsional ku a duna un aporte importante na sektor di turismo na nos isla. Ku e programa di Bonaire Friends nos ta selebrá e dedikashon i kalor di Farid Ayubi, Zoey, Fra i Dora, i nos ta rekonosé nan esfuersonan ekselente pa mehorá eksperiensia di nos bishitantenan i pa personifiká e espíritu di Boneiru su hospitalidat.

Farid Ayubi, e doño dediká di Sunrise Tours Bonaire, ya pa mas ku dos dèkada ta un pilá di sosten i ayudo pa nos bishitantenan. Den un akto ekstraordinario di kariño, Farid a hasi tur loke tabata na su alkanse na momentu ku el a yuda un pareha ku tabata den un situashon difisil. Leslie Howell, ku a sufri un fraktur serio na su kokot'i pia, no por a sigui kana mas na un bich na Boneiru. Aunke e no tabata forma parti di e paseo di Farid, tòg Farid a para su bús, evaluá e situashon i mesora a regla un ambulans. E akshon di kuido di Farid a bai mas leu ku loke ta normal. El a sòru pa komodidat, el a sòru pa siguridat i e tabata un ehèmpel di e kalor sinsero ku ta karakterisá Boneiru su komunidad.

Zoey, un empleado dinámiko i entusiasma di Ocean Oasis a sa di kapturá e esensia di energia hubenil i servisio eksepsional. Durante un komementu na Ocean Oasis un wèspet tabatin e honor di eksperiensia Zoey su atenshon remarka-



bel i su kuido sinsero. Ku entusiasmo Zoey no solamente a duna un servisio intachabel, pero tambe el a krea un ambiente eksitante i plasentero. Su dedikashon pa mehorá e eksperiensia gastronómiko di su wèspetnan pa medio di su interakshon i servisio sinsero, ta reflehá e tipo di hospitalidat ku ta hasi nan eksperiensia na Boneiru inolvidabel.

Meimei di un biahe desgarador, Fra a mostra empatia i sosten ekstraordinario na un famia ku tabata tene rou. Den un periodo difisil Fra a saka un man yen di kompashon pa un bishitante ku a bini Boneiru pa tuma despedida di un serkerí. Su kompreshon, empatia i kòmbersashonnan refleksionante a sòru pa konsuelo i speransa renobá.

Ya pa dos dèkada kaba Dora ta e kara kariñoso ku nos bishitantenan gusta mira ora nan yega Boneiru. Komo un parti integral di e servisio di hür outo di Budget na aeropuerto, konstantemente i konsekuentemente Dora ta saludá nos bishitantenan ku un sonrisa di bon biní i un amabilidad

inigualabel. E ta hunga un ròl krusial ora di sòru ku e promé enkuentro ku Boneiru ta unu di kalor i positivismo. Dora ta serka di baha ku penshun i esaki ta marka un logro den su añanan di servisio remarkabel i sigur e meresé un selebrashon sinsero pa su dedikashon di hopi aña largu.

E programa di Bonaire Friends ta keda firme ku su

kompromiso pa kada siman tira lus riba personanan eksepsional. Pa medio di trese e storianan di Farid Ayubi, Zoey, Fra i Dora bou di atenshon, nos ta honra nan aporte na e kultura inklusivo i akohedor di Boneiru. E programa akí no solamente ta rekonosé nan servisio ehemplar, pero e ta tesorá tambe e konekshonnan outéntiko entre nos bishitantenan i nos komunidad lokal, di manera ku ta surgi rekuerdonan i amistadnan ku ta keda.

E programa di Bonaire Friends ta tira lus riba e personanan ekstraordinario ku ta kontribuí pa hasi Boneiru un destinashon realmente eksepsional. Pa medio di kompartí enkuentronan eksepsional, nos ta enkurashá bishitantenan pa kompartí nan propio storianan, potèrnan i videonan

di enkuentronan eksepsional ku nos komunidad lokal via e página spesial di Bonaire Friends riba <https://bonaireisland.com/bonaire-friends/>. Tourism Corporation Bonaire ta invitá tur hende pa partisipá i pa selebrá e konekshonnan úniko i amistadnan duradero ku ta surgi na nos isla.

E programa di Bonaire Friends ta rekonosé lo mihó di Boneiru i tur siman ta sigui honra personanan remarkabel ku a mostra e servisio ekselente i kaluroso hospitalidat di Boneiru su hendenan. E programa akí ta un prueba di e kultura bibitu di nos isla i ta brinda nos bishitantenan e oportunidat pa bini den kontakto ku nos komunidad lokal, di manera ku esaki ta promové lasonan berdadero i rekuerdonan ku ta dura bida largu.



# Consuelo Memorial ku outo di morto luluis-luluis

**KRALENDIJK** – Consuelo Memorial, e úniko agencia funerario na Boneiru, a haña un outo di morto luluis-luluis. “Bunita pa su doño”, hende grandinan lo bisa ora ta trata di entiero i morto en general. Marka di e outo di morto nobo di Consuelo Memorial ta parse Rolls Royce.

Despues ku pa añanan tabatin apénas dos outo di morto na Boneiru, propiedad di sosiedatnan San Ber-

nardo (Playa) i San Antonio de Padua (Rincon), e predesedor di Consuelo Memorial, El Señoral di Crisma Henriquez di Kòrsou, a kuminsá trese inovashon den asuntunan di entiero. El a bini ku outonan di morto mas moderno.

Despues di tempu el a bende su facilidad na Boneiru ku famia Sedney, ku a bini ku hopi mas inovashon, entre otro un krematorio ‘state of the art’.

Tambe un edifisio grandi i moderno.

Ku e atkisisihon aki awor Consuelo Memorial ta disponé pa transporte di defuntu di diferente vehíkulo. Tin dos outo di morto nor-

mal, 1 waha (‘koets’) i awor esun nobo aki. Mas aleu tin un outo mas bieu ku ta usa pa transporte di morto ku Don Andres entre Boneiru i Kòrsou, mas aleu dos outo di morto den kòntainer.

Consuelo Memorial ta aktivo kaba pa algun tempu na Aruba. Despues ku nan a kumpra Olive Tree na San Nicolas, nan a start ku un facilidad tambe na Piedra Plat riba e isla ei.



*Bonerianonan a sobresali den kontròl tráfiiko aéreo*

# Rolando Emers a fayesé

**KRALENDIJK** – Pa un òf motibu boneriano, òf desendientenan boneriano, a sobresali komo kontroladó aéreo na Kòrsou. Un di nan, Rolando Fransisco Emers, un persona desendiente di Boneiru, a fayesé siman pasá. Djaweps awor ta tuma su despedida. E tabata un empleado klave den aviashon antiano, stashoná komo kontroladó di tráfiiko aéreo.

Algun boneriano ku a traha den sektor di kontròl di tráfiiko aéreo tabata Ro Janga, Celestijn, Dòlfi Wout, Cornelis Eijbrechts, Margie Balentin, Wotty de Palm, Angele Thielman.

## **Boneiru**

Rolando Fransisco Emers a nase dia 11 di mei 1948 na Kòrsou for di mayornan boneriano. Anke ku nunca el a biba na Bonei-

ru, Rolando for di mucha semper a bishitá e isla aki, manera su prima Marichi Frans-Schermer, a bisa: “Rolando tabatin un konosementu ámplio di Rincon, pasobra kasi tur fakansi di skol e tabata di bishita serka su famianan.”

Deis Schermer, otro primu, a deskribí Rolando tambe komo un bon picher den deporte di beisbòl.

## **Karera**

Rolando a traha hopi aña na Departamentu di Aviashon Sivil na Mahuma, Kòrsou. El a studia kontròl di tráfiiko aéreo na Argentina, huntu ku diferente otro kolega, manera Leo Domacassé, ku despues a bira e promé ‘luchthavenmeester’ di Aeropuerto Flamingo.

Emers a traha tantu na e departamentu konserní na Toren di Mahuma, enkargá

ku kontròl di área. Tambe el a traha den e toren di kontròl di Aeropuerto Hato.

Mas aleu Rolando Emers a traha na St. Maarten den toren di kontròl di aeropuerto. Despues el a sigui traha na e sentro na Mahuma.

## **Radar**

Den promé mitar di dékada 70 di siglo 20, Rolando Emers a bai Inglatera pa sigui kurso di radar den besindario di Oxford. Despues di esei el a traha den Sentro di Kontrol Aereo na Mahuma, pero nunca a traha ku radar.

Emers a bira supervisor di warda i den di dos mitar di añanan 90 siglo pasá el a bira hefe di Sentro di Kontròl Aéreo na Mahuma.

Despues ku a independisá e parti aki di Departamentu di Aviashon

Sivil, esta Kontròl di Tráfiiko Aéreo el a drenta servisio tambe di e kompania nobo, awendia DC-ANSP, komo hefe di Sentro di Kontròl Aéreo. El a traha

einan te ku su bahada ku penshun.

Rolando ta kasá ku Erna Schoonewolf, for di kua matrimonio a nase dos yu, un muhé i un yu hòmer.



# Inlubidabel©

Por a konsiderá Domingo Bernabela komo mensahero di Tera Kòrá. Esaki den un époka ku no tabatin telefòn. Domingo Bernabela ta un persona ku e habitantenan grandi di Tera Kòrá no por lubida nunca mas. E tabata un parti impor-

tante di e barío aki. Domingo Abad Bernabela a nase dia 19 di desèmber 1898 na Boneiru. El a muri dia 26 di yùni 1979 riba e isla aki. Su number di kariño tabata Dun. Domingo tabata un persona bon konosí na Tera Kòrá. Tambe

den Playa e tabata un kara konosí, ku tabata hasi sierto trabounan pa gobiernu. E tabata kontrolá por ehèmpel porta di ofisina i magazinnan di gobiernu. Pa e motibu aki hopi bia e tabata kana ku un bòshi di yabi huntu kuné.

Komo ku e tabata gusta bisti un pèchi manera polis, nan tabata yam'é 'polis di Tera Kòrá'. E sa gusta pone òrdu. Den tempu di fiestanan di barí bou di palu di tamarein na Tera Kòrá Domingo tabata un di e tokadónan di barí, huntu ku entre otro Enrique Leito. Tambe ta eksistí foto riba kua por mir'é ta toka wiri.

Den su tempu liber Domingo tabata hasi trabou di mensahero. E tabata hasi respondi. Si un señora na estado kuminsá sinti dolo di parto, Domingo tabata bai yama frumun. Si un persona tabata hopi malu, Domingo tabata bai yama dòkter. I si un hende tabata hala

## Dun – Mensahero di Tera Kòrá

pa muri, ta Domingo e famianan tabata pidi pa bai Playa pa buska pastor bin duna santolio.

Niun esfuerso tabata di mas pa Domingo

Bernabela. E tabata pasa tambe duna notisia di morto. Mester tene kuenta ku den e tempu ei no tabatin radio i korant manera awe.

Naam van den eigenaar: Faam di doño di e boeki:	<i>Bernabela</i>
Voornamen: Number:	<i>Domingo Abad</i>
Geboorteplaats: Lugar di nacementu:	<i>Bonaire</i>
Geboortedatum: Fecha di nacementu:	<i>19 December 1898</i>
Woonplaats: Adres:	<i>Terra Corra' 69.</i>
Nationaliteit: Nacionalidad:	<i>Ned.</i>
Geslacht: Sexo:	<i>M.</i>
Burgerlijke staat: Estado civil:	<i>Geh.</i>
Aantal wettige of gewettigde kinderen: Cantidad di jiu casá of reconocé:	
Handtekening van den eigenaar: Firma di doño di e boeki:	<i>Houder van dit werkboekje, verklaart de schrijver met vertaalen</i>




Foto: Gisela Toss

## MONCHI & TONCHI

Kon bini bo ta asina sigur di lo gana e torneo di peska di Piskabon?

Awèl sí. Mi ta bai kumpra tur bleki di sardinchi, salmou i bòkel den supermerkado.



### KOLOFÓN

Editor: Bonaire Communication Services N.V.  
Kaya Irlanda 12,  
Tel. 717-8482

Redakshon: [extrabon@gmail.com](mailto:extrabon@gmail.com)  
aviso: [avisobon@gmail.com](mailto:avisobon@gmail.com)  
Wèpsait: [www.extraboneiru.com](http://www.extraboneiru.com)  
Facebook: Extra Boneiru

<b>Direktor</b> Shirley Martis 785-3824 796-3824	<b>Partner na Aruba</b> Awe Mainta <b>Partner na Kòrsou</b> Extra <b>Partner na Boneiru</b> Live99
<b>Redakshon</b> Papi Antoin Nathaly Evertsz-Ipcendencia Velli Gijsbertha Edson Pietersz Ibi Piar (deporte)	<b>Layout</b> Maya Beaumont  <b>Konsehero:</b> Bò Antoin 786-6818 <b>Aviso</b> <a href="mailto:avisobon@gmail.com">avisobon@gmail.com</a>

# Santo Domingo di Guzman ta adoptá un yu nobo den persona di pastor Jairo Rodrigo Maduro

Dia 2 di ougùstùs 2022 Pastoor Jairo Maduro a kuminsá huntu ku otro 8 padernan di diferente pais e novisiado den Òrdu di Padernan Predikador den e Fraternidat Saserdotal di Òrdu di Santo Domingo di Guzman. Despues di un aña di reunion pa formashon, Pastor Jairo mester a bai bèk kombento Santo Domingo di Guzman pa primintí obedensia na e reglanan di e Òrdu i esei a tuma lugá huntu ku e saserdotenan ku a kuminsá



tambe e novisiado. E grupo a kuminsá ku 9 saserdote i awor ta kontá ku 20 di Venezuela, Colombia, San Salvador i Aruba.

Pastoor Jairo ta e di dos lokal ku ta miembro di òrdu Santu Domingo di Guzman.

Un den kombento i e otro pafó di kombento!

E promé yu di tera ku a bira Dominico i saserdote tabata Mgr. Antonius Lewis Jacón Thielen van der Veen Zeppenfeldt O.P. ku a nase na Aruba dia 11 di Òktober 1891 i na 1911 a dreña ko-

mbento na Huissen i dia 15 di ougùstùs 1918 e ta keda ordená saserdote, siendo e promé lokal den Òrdu i despues a keda ordená obispu na aña 30 di Desèmber na aña 1948, asina e tabata Vikario Apostóliko na e Vikariato di Curaçao pa un tempu no muchu largu. E ta fayesé dia 4 Yüli 1957 na edat di 65 aña.

E vinkulo ku Pastor Jairo tabatin ku Dominicanan tabata e padernan ku el a topa den parokia di Dakota i Playa. Pader Wijbe Fransén O.P., Pader Jacques vd Lee O.P. i Pader Jan Bouman O.P. kual a resultá p, E un bendishon den su kaminda vokashonal. Bira Dominiko di kombento no tabata ariba mesa, pero si den algun momento e por a pensa esei. Si esei tabata e kaso, kisas E lo no ta na Aruba. Pero konosiendo un saserdote di Colombia (Padre Jhon Freddy) a haña sa ku ta eksistí un forma di biba manera dominiconan pero e asunto di Fraternidat ainda no a bira realidat na Colombia, pesei den un promé momento Pastor Jairo a kuminsá ku e Provinsia di Spaña, pero tabata un poko kompliká pa e orario i distansia. Ora Colombia a duna bisto bueno pa



e Fraternidat, Pastoor Jairo a afiliá na esaki huntu ku otro saserdotenan diosesano. E bisdomnan ku tin miembronan den e Fraternidat aki, no ta pèrdè su saserdotenan, mas bien esaki ta un rikesa grandi den búskeda di bida di santiidat pa e pader mes.

Ku e Òrdu di Padernan Predikador a keda bon strukturá ku mas di 60 komunidad na momento ku Santo Domingo, hopi kansa físikamente a muri dia 6 di ougùstùs 1221 na edat di 51 den su kombento na Bolonia i einan su restunan a keda derá. Na aña 1234 Papa Gregorio IX a deklar'è santu.

Òrdu di Santo Domingo di Guzman a hasi un gran trabou den nos islanan

Na parokia Inmaculada Konsepsion tin un piedra konmemorativo di e 100 aña di presensia di padernan Dominiko ariba nos Islanan. E piedra ta bisa: *“Nos Gratuit pa trabounan religioso di Padernan di Òrden San Domíniko 1870 Yüli 11 1970”* Desde e fecha ei Padernan Dominiko a okupá e islanan di Antianan Hulandes di e tempu aya. Na a traha mas tantu tempu despues di e promé misioneronan a okupá nos islanan. Na Aruba, nan trabou ta bisto den parokianan mas tantu. Pero



awendia nan no tei mas. Pero no mag di lubidá ariba nan trabou. Tambe religiosonan di e Òrdu a traha den diferente tereno ariba nos isla. Den otro momento ta amplia mas ariba e trabou balioso ku misioneronan a hasi.



## Saserdote ta atvertí di 7 peliger pa katólikonan pa falta di formashon

Pader Eduardo Hayen Cuarón, direktor di e semanario Presensia di e Diósesis mehikano di Siudat Juárez, a alertá tokante 7 peligeran pa katólikonan pa falta di formashon.

Den ougùstùs 2022 i den su kuenta di **Twitter**, e saserdote mehikano a atvertí ku “falta di formashon katóliko ta trese

- 1) falta di fe den Eukaristia,
- 2) lubidá riba Konfeshon” i “
- 3) ignoransia di fin di bida”.

Otro peligeran ku ta generá falta di formashon den fielnan ta “

- 4) no biba fe den públiko,
- 5) omento di aborto, eutanasia, union liber i matrimonio igualabel;
- 6) kaida di fertildat i
- 7) materialismo”

Pa evitá e peligeran akí, e saserdote ta kurashá tur katóliko na formashon, konkretamente atraves di katekésis.

Katekésis, ta splika e Katesismo di Iglesia Katóliko, tin komo mishon prinsipal transmishon di fe.

Number di e dokumento eklesial splika ku “katekésis ta un edukashon den fe di muchanan, di hóbennan i adultonan, ku ta inkluí especialmente un enseñansa di e doktrina kristian, duná generalmente di moda orgániko i sistemátiko ku mira pa inisiá nan den e plenitud di e bida kristian”.

**HULANDA**

# Kachó di reskate ta haña hòMBER di 91 aña den awa

ZWOLLE – Un hòMBER djabièrnè anochi i a keda haña 24 ora despues den di 91 aña ku a kai den awa deklarà komo pèrdí, a keda bon estado di salú. Kachó



di reskate, Mia, a sa di haña e hòMBER, RTV Oost ta skirbi.

Bisiña Alie a deskubrí ku su bisiña tabata pèrdí momentu ku djasabra mainta el a bai serka dje. Dor di esaki a kuminsá ku un akshon di búskeda via Burgernet i un drone tabata sirkulá riba e área pa buska e hòMBER.

Mas despues riba e dia, e kachó di reskate Mia, kende tambe a forma parti i e búskeda, a haña e hòMBER di Zwolle. Ambulans a hib'è hospital i el a keda un anochi pa opservashon.

Djabièrnè anochi e hò-

ber a bai kana pa hui for di un muzik duru di un fiesta un poko mas leu, el a konta e media regional. El a trompeká den un área di lodo i a kai riba su lomba djis pegá ku su kas. E no tabatin telefòn mobil, pues no por a bati alarma i mester a warda te na momentu ku un hende yega pa yudansa.

“Mi ta bayendo bon,” e hòMBER a bisa. “Ainda mi mester bin bei un poko. Pero mas aleu ta bayendo bon ku mi. Danki Dios a haña mi tòg hopi lihé.”

# Ministerio Públiko no por persiguí sospechoso di abuso seksual

ASSEN – Ministerio Públiko no mag persiguí un hòMBER sospechá di abuso seksual dentro di e komunidad di Testigu di Yehova. Hustisia a usa informashon konfidensial den e investigashon penal, asina Korte a dikta djamars. P'esei Korte a deklarà Ministerio Púb-

liko no atmisibel den un veredikto intermedio.

E hòMBER di 48 aña di Assen na 2016 lo a abusá seksualmente di un mucha di e tempu ei 8 aña. Ministerio Públiko na 2018 durante un entrada hudisial, tabata buska dokumentonan di komiténan di Testigu

di Yehova di kua e tabata forma parti komo miembro ku a akus'è di abuso seksual kontra un mucha menor di edat.

E dokumentonan akí di ansiano di e komunidad di Testigu di Yehova, ta konfidensial i ta kai entre otro bou di e asina yamá derecho

di apstenshon, manera por ehèmpel tambe ta konta pa dòkter, RTV Drenthe ta skirbi.

Anteriormente e hues di investigashon a dikta ku mester eliminá e dokumentonan. Seguidamente a eliminá e dokumentonan, pero segun Korte di Overijssel, e dokumento ainda tabata kontené infor-

mashon konfidensial. Asina tin ainda e elaborashon di kombersashonnan ku ansianonan, e kartanan di e sospechoso na e ansianonan i nan reakshon riba esaki.

Segun Korte, no a hasi daño solamente na e interesnan di e sospechoso, pero esaki ta mishu ku e konfiansa den e derecho den su totalidat.



## Muchanan ta bati alarma

### Kurpa sin bida den kanal

HAGHORST – Na Haghorst, Brabant, djadumingu mèrdia dos mucha hòMBER a bati alarma momentu ku nan e mira un kurpa sin bida ta drif den awa, Polis ta informá.

E kurpa sin bida tabata drif den e kanal banda di Wilhelminadijk. Pa

binti pasá di diesdos e muchanan a hasi e notifikashon di esaki,

Despues di un investigashon, Polis ta informá ku e identidat ta konosí. Ta trata di un hende muhé. A informá e famia. No ta deskartá un krímen.



*Riba maneho pa ekskluí vitamina i mineral pa asegudadonan*

# Komishon a deliberá ku gerensia di SVB

**WILLEMSTAD**-- Djaluna 14 di ougùstus Miembronan di Parlamento a bin huntu den un Komishon Sentral pa risibí presentashon di gerensia di SVB relashoná ku e maneho pa ekskluí vitamina i mineral pa asegudadonan di seguro básiko kontra gastunan di malesa (BZV).

sentashon, miembronan di Parlamento a haña e oportunidat pa hasi pregunta relashoná ku e tópiko. Na final di e promé tanda di pregunta, SVB a pidi espasio pa por formulá e kontestanan. Presidente di Parlamento sra. Charetti America-Francisca skòrs e reunion te un próksimo aviso.

Despues di e pre-



*Huntu ku e.o General Boots*

## Komandante di forma marítimo serka gobernadó

**WILLEMSTAD**--Komandante di forsa marítimo den Karibe (CZMCARIB) a hasi goberndador Su Ekselensia Lucille George-Wout un bishita. Esaki a tuma lugá riba djaluna 14 di ougùstus. Huntu ku e komandante a bai tambe direktor di warda kosta Karibe i general di brigada

Frank Boots, i komandante Walter Hansen. Komandante Hansen ta e sucesor di General Boots i a sera konosí ku gobernador. Durante e bishita, gobernador a gradisí e General pa su kompromiso i servisionan pa protehá integridat di e teritorio di Reino den Karibe.



*Di Ala femenino di partido MAN*

## “Menstruashon Solidario”

**WILLEMSTAD**--Ala Femenino di Partido MAN ta satisfecho i orguyoso di e éksito di e di dos edishon di “Menstruashon Solidario” ku a organisá resientemente.

Ala Femenino di Partido MAN dia 28 April último a kolektá “maandverband” riba Dia Internashonal di Higierna Menstrual i alabes papia riba e tabú di pobresa menstrual ku ta nifiká falta di aksesio na produktonan di uso pèrsonal pa e periodo di menstruashon, manera p.e. “maandverband”/kotèks.

Pero tambe konsientisá riba higiena durante di e periodo di menstruashon di hende muhé / mucha muhé.

E pobresa menstrual a bira mas grandi mirando e grado di pobresa ku a oumentá den nos pais resientemente.

Na Kòrsou tin hopi hende i mucha muhé ta pasa den situashon fèrfelu òf nan ta pèrdè dia di trabou òf skol pa motibu ku no tin sèn pa kumpra produktonan di uso pèrsonal pa su menstruashon.

Den hopi kaso menstruashon ta presentá ora nan ta na trabou, skol òf un lugá públiko i nan no tin e produktonan ku nan tin mester di dje pa motibu finansiero / sosial. Esaki, no opstante e produkto aki ta den makutu básiko.

Den kuadro di empoderamentu di hende muhé nan, Ala Femenino di Partido MAN a organisá dos djasabra di “drive thru” ku a karga e nòmber.

“Menstruashon Solidario”. A paketá i repartí tur loke a kolektá na entre otro prizòn (SDKK) i instansianan di hóben manera GOG, Casa Manita, i Huize Sr.Jozef pero tambe na Voedselbank.

Diferente miembronan di Ala Femenino tabata enkargá ku repartishon di paketenan di “maandverband” den luna di mei i yüni na 46 skol básiko, avansá, SBO, HBO/Universidat.





ARUBA

# Persecucion tras di un auto diadomingo anochi

ORANJESTAD -- Dia-domingo anochi algo pasa di 7'or a cuminsa un persecucion tras di un Nissan March color blanco. Esaki a pasa ariba Watty Vos Boulevard direccion rotonde nobo di Tanki Leendert.

Akinan e auto cu no tawata kier a para pa polis a bay direccion nort, esta pa e rotonde bieu cu ta conecta pa bay Paradara, Moko, of Tanki Flip. Varios automobilista mester a maniobra, pa asina evita un boksmen-

to. Na yegada di e March na e rotonde bieu di Tanki Leendert el a tuma pa bay pabou direccion Tanki Flip. E persecucion a termina momento cu patruyanan a intercepta e vehiculo y

logra par'e altura di e misa San Juan Pablo II situa na Tanki Leendert.

Polisnan a puntr'e e motibo pakico e lo tawata coriendo duro, y entre nan e

la bisa agentenan e pakico y cu ta su cas e mester a yega lihe cu tawata "net om de hoek". A hala su atencion si debidamente y e por a sigui bay.



# Supuesto candela a resulta di tawata algo otro

ORANJESTAD -- Dia-domingo anochi algo pasa

di 8'or polis y dos unidad di Brandweer a sali pa un

cas na candela na Primavera, situa mas pariba di Club Portugues. Na yegada di tanto polis y brandweer, nan no tawata mira nada di candela pero si poco huma.

Polis y Bomberonan a drenta e cura y a bin topa cu un bari cu palo aden cu tawata kimando, pues nada cu e cas ta na candela.

Posiblemente algun persona cu ta biba rond a mira huma bayendo halto y a pensa cu a cas ta na candela.



*En conexion cu comienso di aña escolar 2023-2024*

# Exito na cada alumno, mayor y maestro

ORANJESTAD - Manera ta conoci, nos ta den e ultimo dianan di vakantie di scol, y hopi ta e muchanan cu ta preparando pa cuminsa un aña escolar nobo, yena di energia y entusiasmo. E mayornan tambe yena di emocion, ta cumprando tur material necesario y preparando tur cos na cas, pa asina nan yiu ta bon prepara pa cuminsa un aña mas di estudio. E maestronan di nan banda a drecha e klasnan pa asina duna un bon bini na tur e muchanan, cu ansiosamente ta warda pa sera conoci cu nan maestro nobo y compañeronan di klas.

Prome Minister Evelyn Wever-Croes ta desea tur alumno hopi exito pa cu e aña escolar nobo. Tambe, e ta pidi tur e muchanan pa haci nan best, y duna tur di nan banda pa logra resultadonan positivo. E ta tuma hopi esfuerzo y perseverancia pa logra yega na metanan profesional, pero un-abes cada alumno duna nan parti, pa ta e miho version di nan mes, nan lo logra cosnan grandi, haciendo nan mes, nan mayornan y nan maestro sumamente orguyoso di nan.

"Un danki tambe na tur maestro pa e amor cu nan ta eherce den nan trabou,

yudando asina e mayornan educa nan yiunan di e miho forma. Ta danki na boso esfuerzo, Aruba por conta

cu profesionalnan grandi den futuro, cu por carga y hiba e pais aki den e mihor direccion. Mi ta desea tur

clase di exito na tur alumno, mayor, y maestro pa cu e aña escolar 2023-2024" Prome Minister a expresa.



## STATIA/SABA/ST. MAARTEN

# Lansamentu programa bienestar di empleado

**THE BOTTOM** – Entidat Públiko Saba a lansa e programa di bienestar di empleado pa su empleadonan. E programa ta ofresé kresementu personal i profeshonal a base di un iniciativa di seis luna i ta fokus riba liderazgo i maneho.

A selektá un tim di ocho profeshonal kuidadosamente pa sigurá e éksito di e programa. E programa di bienestar di empleado ta dirigí riba diferente área, inkluso emoshonal, mental

síkiko, kreativo i desaroyo energétiko

E programa ta konsistí di aktividatnan, workshop i seshonnan di treinen ku ta fokus riba kapabilitat di e empleadonan manera komunikashon, liderazgo, inteligensia emoshonal i balanse den bida.

Partisipantenan ta benefisiá ku coaching personalisá, workshop den grupo, diskushonnan interaktivo i strategianan relevante pa tantu nan bida profeshonal

komo personal.

Dor di invertí den su empleadonan, Entidat Públiko Saba ta demostrá su kompromiso pa krea kultura di trabou positivo i sigurá éksito riba término largu pa su empleadonan. E programa su meta ta pa empoderá empleadonan pa alkansá nan ful potensial i próspero den nan ròlnan. E kolaborashon akí tabata posibel huntu ku e departamentu di rekursu humano di esun di salubridat públiko.

## Minister di Hustisia a interkambiá ku studiantenan di St. Dominic High School

**PHILIPSBURG** – Minister di Hustisia, Anna Richardson, resientemente a bishitá St. Dominic High School, riba un invitashon ku ta den lus di diskushon ku e alumnonan di grupo 3, ku a kontené tópikonan importante.

Minister Richardson su bishita a proba di ta unu inspirativo i edukashonal pa tantu e studiantenan komo e minister mes.

Durante e seshon interaktivo, Minister Richardson a profundisá den kombersashonnan signifi-

kativo ku e studiantenan, splikando nan tópikonan manera perseveransia, lanta kontra preshon sosial, hasi bin eskoho i e significashon di demostrá bon komportamentu, inkluso respèt pa tantu adulto komo mucha.


Un fokus sentral di e diálogo, tabata e djùmpùp di mardugá resien. Minister Richardson a trese su preokupashon serka Kuerpo Polisial Sint Maarten pa loke ta trata e number di alarma di hubentut, ku tabata opservá ku hóbenan tabata bou di influensia di supstansia durante e

evento.

Esaki a konduzí na un interkambio proaktivo den kua Minister Richardson a invitá studiantenan pa kompartí nan bista riba e rasonnan tras di e oumento di uso di droga i alkohòl, meskos tambe a risiko di komportamentu manera aktividatnan seksual tempran.

Den kontesta riba e retonan akí, Minister Richardson a kompartí informashon balioso tokante e esfuersonan ku e ministerio di hustisia ta hasiendo. El a relevá ku e ministerio aktivamente ta trahando riba e desaroyo di un póli-sa ku e meta pa sigurá bon struktura i eventonan seif dentro di e komunidad. E póli-sa akí ta enserá medidanan di siguridad for di e fase inisial di aplikashon i lo inkluí provishonnan ku teman di adulto, komo mandato dor di leinan eksistente.

Rekonosiendo e importancia di perspektivanan di hubentut i ambiente mas seif, Minister Richardson a presentá e studiantenan un asignamentu di partisipashon. El a reta e studiantenan pa kolektivamente prepará un presentashon ku sugerensianan pa akohé un atmósfera seif i di sosten pa e hubentut di Sint Maarten.



## Warda Kosta ta reskatá barkunan den problema

**ORANJESTAD (EUX)** – Djadumingu 13 di ougùstùs den oranan di mèrdia Sentro di Notifikashon a risibí notifikashon di un barku den problema. E barku tabatin problema ku motor i tabata drif den awanan entre Sint Eustatius i Sint Maarten. Entretantu a resultá ku un di dos barku na un distansia di mas òf ménos 4 mia nótiko for di Sint Eustatius, tambe tabatin problema ku motor.

Mesora a inisiá ku un operashon di reskate te 13 mia nótiko na e kosta nortwèst di Sint Eustatius. Banda di kuartu pa tres a eskoltá e segundo barku pa Gallows Bay i a mar'é na un bui. A pone KMar na al-

tura ku a sigui ku e proseso di imigrashon.

Na e momentu ei ainda tabata falta e promé barku. Banda di kuartu pa seis pilotnan di un avion di Winair a mira e barku riba su banda, 13 mia nótiko nortost di Sint Eustatius. No por a mira moveshon di hende riba e barku. Warda Kosta promé ku anochi a sera a para e búskeda di e barku relashoná ku e lokalidat eksakto i a kontinuá den oranan di mainta.

Djaluna 14 di ougùstùs den oranan di mainta, Warda Kosta di St. Kitts i Nevis a tou e barku hiba Saba. Tur kuater tripulante tabata seif i bon.

Popularidat ta relativo

P'esei un propio estilo

No solamente pa ta eksitoso

Sino sigur mas balioso

**Brò Kès 93.5 FM**

pokopoko pero sigur mas i mas hende ta ...

Skuch'è



Telefon/ WhatsApp +599 701 0935

www.radio935bonaire.com

DEPORTE

# Muchanan a gosa un bòl

Muchanan a gosa un bòl ayera na Rincon i djamars a toka turno pa Fèlt Elio Flores. INDEBON ta invitá tur mucha pa bin sera fakansi ku aktividat den e diferente bari-onan di Boneiru. Mayornan por trese e muchanan. Entrada ta pòrnada.



## Hungadónan U14 femenino ta konosí

KRALENDIJK--Federashon di Futbòl Boneriano ku ta FFB, a presentá su lista di hungadónan U14 femenino.

Head Coach di e selekshon Polly Winklaar.

Inga Tjin-A-Sie.

Nathaniela Emerenci-ana.

Pedro Rodriquez i Arvi-ena Vis.

**Selekshon.**

Allisha Trinidad.

Rasheena Sint Jago.

Shekinah Janzen.

Shaimaris Mercera.

Xaquenne Saragoza.

Latoya Willems.

Shalpphira Emerenci-ana.

Qsheantely Martinus.

Nalgelly Janga.

Maycy Trinidad.

Simonë Sint Jago.

Genisha Piar.

Geraldine Alberto.

Isabella Prado.

Rudzayrima Dorothea.

T-Shalney Frans.

Eleesha Den Boef.

Charlotte Van Loo.

## Klínika Baseball5/futbòl

KRALENDIJK--Klínika di Baseball5/futbòl.

Esaki ta tuma lugá durante dia di 8or mainta pa 14:30. Tin un kantidat di kupo di 120 lugá pa mucha di 6-14 aña.

Programa atardi.

15:00 – 18:00.

Entrada ta liber pa tur mucha.

Esaki ta di djaluna 14 ougùstùs Stadion Antonio Trinidad na Rincon.

Djårason 16 ougùstùs 2023 a Fèlt Eion Flores na Amboina. Djabièrnè 18 ougùstùs 2023 na Fèlt ATC / Amas. Lo tin bouncers ku spèlnan di antes.

Tambe lo tin diferente aktividatnan mas.

# Rosamentu pa traha pista di Dragrace a kuminsá

**KRALENDIJK**--Tra- bou a kuminsá pa e di dos parti di e proyekto, pista pa pone fever i dragrace. Manera ta konosí, resientemente a pone asfalt riba e parti di e tereno ku ta destiná pa ponementu di fever i for di wikènt pasá, a kuminsá ku rosamentu di

mondi den e área pariba di e pista pa fever. Ya tin un distansia hopi largu rosá i a saka e ramanan ku trùk pa pone nan na otro sitio.

Si tur kos sigui kana manera ta bai, denter di 1 pa 2 siman, e tereno ta kla pa kuminsá ku preparashon pa konstrukshon di e pista

pa dragrace, esta kaminda 2 vehíkulo por pusta banda di otro. Terrence de Jongh, hefe di INDEBON, a keda pa papia e siman aki, tokante kon ta bai atendé ku

e pista pa fever ku ta praktikamente kla pa pone den práktika. Ta kere ku e lo mensioná tambe, e dia ku ta organisá e promé evento riba e pista pa fever. Na e

okashon, lo hasié pregunta tokante e desaroyo, e parti ku a kuminsá rosa awor, pa traha e pista di dragrace.



**Multiuse Desk**  
**\$129**





**CityShop**  
Smart shopping ▶ Better living

**15.6" HP Laptop**  
Intel Core i5  
8 GB RAM  
Windows 11

**SPECIAL PRICE**  
**\$819**

**OFFICIAL STORE**



**Aeromesh Office Chair**  
**\$189**



**Ready FOR SCHOOL**



**HP Wireless Printer**  
**SPECIAL PRICE**  
**\$79**



**Solid Wood 1-Drawer Desk**  
**\$169**



**30 ANIVERSARIO**



**Wireless Headset**  
**\$99**

